

V E N D I M
Nr. 281, datë 2.6.2000

PËR ORGANIZIMIN DHE FUNKSIONIMIN E AKADEMISË SË POLICISË

Në mbështetje të nenit 100, të Kushtetutës dhe në zbatim të nenit 29, të ligjit nr.8461, datë 25.2.1999, “Për Arsimin e Lartë në Republikën e Shqipërisë”, dhe të ligjit nr.8553, datë 25.11.1999 “Për Policinë e Shtetit”, me propozimin e ministrit të Rendit Publik, Këshilli i Ministrave

V E N D O S I:

1. Akademia e Policisë është shkollë e lartë dhe institucioni i vetëm përgjegjës për realizimin e arsimimit policor të punonjësve të Policisë së Shtetit.

2. Akademia e Policisë ka për mision formimin dhe kualifikimin e punonjësve të policisë të të gjitha niveleve për të qënë të aftë e të përkushtuar për mbrojtjen e rendit dhe sigurisë publike.

3. Akademia e Policisë është person juridik dhe përfaqësohet nga drejtori.

4. Akademia e Policisë ka për detyrë:

- Të realizojë formimin profesional të punonjësve të policisë të rolit të mesëm;

- Të kryejë kurse kualifikimi e specializimi për punonjësit e policisë të rolit të mesëm, të lartë e madhor;

- Të realizojë kualifikimin shkencor pasuniversitar sipas kriterëve të përcaktuara.

5. Kohëzgjatja e studimeve të formimit bazë profesional të punonjësve të policisë të rolit të mesëm është tre vite akademike me shkëputje nga puna.

Për shtetasit që vijnë me arsim të lartë jopolicor afati i studimit është deri në një vit akademik.

Kualifikimi i punonjësve të policisë të rolit të mesëm, të lartë e madhor bëhet me afate kohore, sipas llojit të kualifikimit, nevojave, në mënyrë periodike dhe në bazë të kriterëve të përcaktuara në aktet ligjore e nënligjore për gradat në policinë e shtetit.

Akademia e Policisë bën edhe kualifikimin e punonjësve të policive të tjera, në bazë të marrëveshjes paraprake ndërmjet Ministrisë së Rendit Publik dhe ministrive nga të cilat ata varen.

6. Në varësi të Akademisë së Policisë krijohet Instituti i Policisë, i cili ka për detyrë formimin profesional të punonjësve të policisë në rolin bazë, në një afat kohor një vit akademik. Kjo detyrë arrihet mbi bazën e realizimit të planeve e programeve nga strukturat përgjegjëse të këtij Instituti.

Në përbërje të institutit të policisë janë edhe qendrat e kualifikimit të punonjësve të policisë në rolin bazë. Kualifikimi në këto qendra realizohet në një afat kohor nga dy deri në tetë javë.

7. Organizimi, drejtimi dhe kontrolli i procesit mësimor përcaktohen në statutin e kësaj shkolle. Struktura e Akademisë së Policisë dhe Statuti i saj miratohen nga ministri me propozim të Këshillit të Akademisë së Policisë.

8. Emërimi i drejtorit të Akademisë së Policisë bëhet në përputhje me nenet 8 dhe 20 të ligjit, “Për Arsimin e Lartë në Republikën e Shqipërisë”, dhe përzgjidhet ndër funksionarët me gradë të rolit madhor.

9. Emërimi dhe klasifikimi i personelit të Akademisë bëhet në përputhje me nenin 8 dhe 26 të ligjit, “Për Arsimin e Lartë në Republikën e Shqipërisë” dhe nenit 15 të ligjit, “Për Policinë e Shtetit”. Ndërsa për Institutin e Policisë bëhet sipas nenit 15 dhe 19 të ligjit, “Për Policinë e Shtetit”. Për personelin civil, klasifikimi bëhet sipas akteve ligjore në fuqi.

10. Akademia e Policisë për realizimin e misionit të saj, vendos marrëdhënie me shkollat e tjera të larta të vendit tonë për shkëmbim përvoja e bashkëpunimi në procesin mësimor, shkencor dhe në kualifikimin e personelit mësimdhënës. Me shkollat simotra të huaja zbatohet paragrafi 3 i nenit 8 të ligjit, “Për Arsimin e Lartë në Republikën e Shqipërisë”.

11. Pranimi në Akademinë e Policisë dhe në Institutin e Policisë bëhet me konkurs. Mënyra e organizimit të konkursit të pranimi dhe vlerësimit të rezultateve përcaktohen në rregullore të veçantë, të propozuar nga Këshilli i Akademisë së Policisë dhe të miratuar nga ministri.

Kuotat e pranimi në Akademinë e Policisë përcaktohen sipas nenit 31, paragrafi i dytë i ligjit, “Për Arsimin e Lartë në Republikën e Shqipërisë”, ndërsa në Institutin e Policisë, sipas urdhrit të ministrit.

Për t’u pranuar në Akademinë e Policisë dhe Institutin e Policisë konkurojnë shtetasit që

plotësojnë kërkesat e nenit 16 të ligjit, “Për Policinë e Shtetit”, si dhe kërkesat e Rregullores së Personelit të Policisë së Shtetit.

Për t’u pranuar në Akademinë e Policisë, konkurojnë punonjës policë që kanë mbaruar Institutin e Policisë, mbasi të kenë punuar dy vjet në bazë. Raporti i pranimi ndërmjet kandidatëve jashtë rradhëve të policisë dhe atyre që kanë mbaruar Institutin e Policisë caktohet me urdhër të ministrit.

12. Trajtimi ekonomiko-financiar i studentëve të Akademisë së Policisë dhe kursantëve të Institutit të Policisë, bëhet sipas akteve normative të veçanta.

13. Studentët dhe kursantët pas pranimi në Akademinë dhe Institutin e Policisë, bëjnë betimin dhe nënshkruajnë kontratën e pranimi sipas nenit 17 të ligjit, “Për Policinë e Shtetit” dhe Rregullores së Personelit të Policisë së Shtetit.

14. Buxheti i Akademisë së Policisë është zë më vete në buxhetin e ministrisë. Në të përfshihen shpenzimet për Akademinë, kërkimet shkencore, botimet, Institutin e Policisë dhe kualifikimin e punonjësve të policisë të të gjitha niveleve.

15. Studenti që mbaron Akademinë e Policisë titullohet “specialist i lartë policie” dhe pajiset me diplomë nga ky institucion.

Kursanti që mbaron Institutin e Policisë titullohet “polic” dhe pajiset me dëshmi, e cila lëshohet nga drejtoria e Akademisë së Policisë.

16. Në zbatim të nenit 43 të ligjit, “Për Arsimin e Lartë në Republikën e Shqipërisë”, dhe nenit 18, pika 3 të ligjit, “Për Policinë e Shtetit”, Akademia e Policisë bën njëvlerfshmërinë e certifikatave, diplomave dhe gradave shkencore të fituara në shkollat e huaja, në fushën e policisë, në përputhje me vendimin përkatës të Këshillit të Ministrave.

17. Ministri i Rendit Publik në zbatim të këtij vendimi, ngarkohet për të nxjerrë aktet nënligjore për funksionimin e Akademisë dhe realizimin e misionit të saj.

18. Vendimi nr.405, datë 15.9.1992 i Këshillit të Ministrave, “Për krijimin e Akademisë së Rendit Publik” dhe vendimi nr.437, datë 12.9.1994, i Këshillit të Ministrave, “Për disa ndryshime e shtesa në vendimin nr.405, datë 15.9.1992, të Këshillit të Ministrave”, si dhe aktet e tjera nënligjore që bien në kundërshtim me dispozitat e këtij vendimi shfuqizohen.

Ky vendim hyn në fuqi pas botimit në Fletoren Zyrtare.

KRYEMINISTRI
Ilir Meta